

ԿԱՐԾԻՔ
ՊԱՇՏՈՆԱԿԱՆ ԸՆԴԴԻՄԱԽՈՍԻ

**Լիլիթ Մանվելի Պետրոսյանի «Հակակոռուպցիոն մեխանիզմների ֆինանսական
գնահատման հիմնախնդիրները Հայաստանի Հանրապետությունում» թեմայով
ատենախոսության վերաբերյալ ներկայացված Ը.00.03 - «Ֆինանսներ,
հաշվապահական հաշվառում» մասնագիտությամբ տնտեսագիտության
թեկնածուի գիտական աստիճանի հայցման համար**

Ատենախոսության թեմայի արդիականությունը

ՀՀ-ում կոռուպցիայի նվազեցման գործում հրատապ խնդիրներից են տնտեսական և ենթակառուցվածքային բարեփոխումները, հատկապես կոռուպցիայի խորացման պատճառների բացահայտումը և հակակոռուպցիոն հետևողական քաղաքականության իրականացումը՝ սոցիալ-տնտեսական ծանր հետևանքների նվազեցման համատեքստում:

Հարկ է նշել, որ բազմաթիվ հետազոտություններ են կատարվել տարբեր հետազոտողների կողմից, որոնք ուղղված են եղել կոռուպցիայի դեմ պայքարին և հակակոռուպցիոն քաղաքականության իրականացմանը, բայց, այնուամենայնիվ, դեռևս կան մի շարք բացթողումներ, որոնք խթանում են կոռուպցիայի զարգացմանը: Հետևաբար, կոռուպցիայի դեմ պայքարը լավագույնս կազմակերպելու համար անհրաժեշտ է վերանայել տնտեսության բոլոր հատվածներում գործող տնտեսական մեխանիզմներն ու լծակները, իրականացնել հետևողական քաղաքականություն, գործադրել կառավարման արդյունավետ գործիքակազմ, ուղղված՝ պետական կառավարման համակարգում բարեփոխումների իրականացմանը և հակակոռուպցիոն մեխանիզմների ներդրմանը:

Կառուցվածքային առումով հետազոտությունն իրականացվել է ատենախոսությունում բարձրացված հիմնահարցերի և դրանց հետ կապված խնդիրների լուծման տրամաբանական հաջորդականության ապահովման

սկզբունքով: Նախաբանում հիմնավորվել է թեմայի արդիականությունը, սահմանվել են հետազոտության նպատակը և խնդիրները: Ներկայացվել են հետազոտության օբյեկտը և առարկան, տեսական և տեղեկատվական հիմքերը, գիտական նորույթը և ստացված արդյունքների գիտագործնական նշանակությունը:

Ատենախոսության առաջին գլուխը նվիրված է հակակոռուպցիոն մեխանիզմների առաջացման նախադրյալների և դրանց տեսամեթոդաբանական գնահատման մոտեցումների ուսումնասիրությանը:

Ատենախոսության երկրորդ գլխում ներկայացվել են հակակոռուպցիոն մեխանիզմների ֆինանսական գնահատման ուղղությունները ՀՀ-ում:

Ատենախոսության երրորդ գլխում դիտարկվել են հակակոռուպցիոն մեխանիզմների ֆինանսական ռազմավարության մշակման գերակայությունները և դրանց կիրառման անհրաժեշտությունը Հայաստանի Հանրապետությունում:

Ատենախոսության արդյունքների հավաստիությունը պայմանավորված է նրանով, որ դիտարկվող հիմնահարցի համար տեսական հիմք են հանդիսացել կոռուպցիայի և հակակոռուպցիոն քաղաքականության վերաբերյալ տարբեր տնտեսագետների գրքերը, գիտական հոդվածները, ինչպես նաև՝ ստացված արդյունքների փորձարկումը և կիրառումը:

Ատենախոսությունում հեղինակը ներկայացնում է մի շարք արդյունքներ, որոնցից որպես **գիտական նորույթ** առանձնացնում է հետևյալները՝

1. Բազմագործոն ռեգրեսիոն էկոնոմետրիկ մոդելի կիրառմամբ գնահատվել է պետական կառավարման համակարգում պաշտոնատար անձանց եկամուտների վրա ազդող կոռուպցիոն ռիսկերի չափը՝ առանձնացնելով կոռուպցիոն ռիսկի առաջացման դրդապատճառները հակակոռուպցիոն նպատակադրված քաղաքականության իրականացման համատեքստում:
2. Մշտադիտարկման արդյունքների հիման վրա բացահայտվել են ՀՀ-ում դեղագործության շուկայի մասնակիցների վարքագիծը՝ ուղղված կոռուպցիոն գործարքների իրականացմանը, ինչպես նաև մշակվել են հակակոռուպցիոն մեխանիզմի ֆինանսական գնահատման ռազմավարական քայլերը:
3. Հակակոռուպցիոն ռիսկերի ֆինանսական գնահատման արդյունքում բացահայտվել են ՀՀ-ում կոռուպցիայի, անվանական ՀՆԱ-ի, ժողովրդավարության,

միջին ամսական անվանական աշխատավարձի ցուցանիշների միջև գոյություն ունեցող կապը, ինչպես նաև մշակվել է կոռուպցիայի նվազեցման ձևաչափ՝ ուղղված ՀՀ-ում տնտեսական բարեկեցության բարձրացմանը:

Ատենախոսությունում մշակված մոտեցումները, արված առաջարկություններն ու ընդհանրացումներն ունեն տեսական և գործնական նշանակություն:

Ատենախոսությունը զերծ է **դիտողություններից**: Դրանցից կարելի է նշել հետևյալները՝

1. Աշխատանքը առավել շահեկան կլիներ, եթե հեղինակի կողմից միջազգային փորձի ուսումնասիրության արդյունքում առաջարկվեր իրականացնել ՀՀ-ում կոռուպցիոն ռիսկերի նվազեցման մեխանիզմ ըստ ֆիզիկական և իրավաբանական անձանց եկամուտների և ծախսերի ինքնահայտարարագրման և նրանց կողմից առևտրային բանկերում եկամուտների և ծախսերի քաղվածքների խաչաձև ստուգման արդյունքների:

2. Ատենախոսությունում հակակոռուպցիոն մեխանիզմների ֆինանսական գնահատումը սահմանափակվել է միայն երկու ոլորտների ներկայացմամբ: Սակայն աշխատանքը առավել շահեկան կլիներ, եթե հեղինակը ներկայացներ տնտեսության այլ ոլորտներում, օրինակ՝ շինարարության, մեծածախ առևտրի և ծառայությունների, կոռուպցիոն ռիսկերի առաջացման մեխանիզմները և առաջարկեր դրանց նվազեցման գործնական քայլեր:

3. Ատենախոսության արդյունքները առավելապես ունեն գործնական նշանակություն: Հետևաբար, աշխատանքը առավել շահեկան կլիներ, եթե հեղինակը առավել մեծ ուշադրություն դարձներ ներկայացված եզրույթների ակադեմիական ուղղվածությանը, տարբեր տեսություններին, ինչպես նաև՝ դրանց վերլուծությանը:

4. Ատենախոսության 3.1.1 գծային մոդելում ներառվել են ցուցանիշներ, սակայն անհասկանալի է, թե հեղինակը ինչ սկզբունքով է սահմանափակվել ներկայացնելով ընտրված ցուցանիշները, և թե ինչու չեն ներառվել օրինակ՝ դատական համակարգի գնահատման, բյուրոկրատիայի և աշխարհագրական գործոնները:

ԵԶՐԱԿԱՑՈՒԹՅՈՒՆ

Վերոնշյալ դիտողությունները, սակայն, չեն ազդում հետազոտության արդյունքների վրա, այլ դրանք հետապնդում են հակակոռուպցիոն մեխանիզմների ֆինանսական գնահատման հիմնախնդիրներին նվիրված հետագա աշխատանքների ուղղությունների բացահայտման նպատակ:

Լիլիթ Մանվելի Պետրոսյանի թեկնածուական ատենախոսությունն ունի գիտագործնական նշանակություն, որի արդյունքների կիրառումը կարող է նպաստել հանրապետությունում կոռուպցիոն ռիսկերի գնահատմանն ու կրճատմանը:

Հեղինակը հանդես է բերել մասնագիտական ու վերլուծական անհրաժեշտ մակարդակ, ինչի մասին է վկայում բուն ատենախոսությունը և դրանում ստացված արդյունքները:

Հետազոտության հիմնական արդյունքները հրապարակված են, իսկ ատենախոսության սեղմագիրը համապատասխանում է հետազոտության բովանդակությանը:

Լիլիթ Մանվելի Պետրոսյանի «Հակակոռուպցիոն մեխանիզմների ֆինանսական գնահատման հիմնախնդիրները Հայաստանի Հանրապետությունում» թեմայով ատենախոսությունը համապատասխանում է «Հայաստանի Հանրապետության գիտական աստիճանաշնորհման կանոնակարգի» 7-րդ կետի, ինչպես նաև՝ թեկնածուական ատենախոսությունների համար ներկայացվող այլ պահանջներին, և հեղինակն արժանի է Ը.00.03 - «Ֆինանսներ, հաշվապահական հաշվառում» մասնագիտությամբ տնտեսագիտության թեկնածուի գիտական աստիճանի շնորհմանը:

ՊԱՇՏՈՆԱԿԱՆ ԸՆԴԴԻՄԱԽՈՍ,
Տնտեսագիտության թեկնածու,
ՀՀ ԱՆ ՀԿԱԾ Քաղ. սպասարկման բաժնի պետ,
Արդարադատության փոխգնդապետ՝

Խ.Թ. Իգիթյան

Պարոն Խ. Իգիթյանի
Ստորագրությունը հաստատում են՝
Մարգարիտ Խաչատրյան
(ՀԿԱԾ Ֆինանսական բաժնի պետ,
արդարադատության գնդապետ)



03.06. 2022 թ.